

Naqqiut

(Matumuuna akissuteqaat 01-05-2019-imeersoq taarserneqarpoq)

Inatsisip nr. 262, 16. marts 2016 ilanngunnissaannut, selskab-it inatsisaata, inuussutissarsiutigalugu suliffeqarfiutilinnut inatsisaata, inuussutissarsiutigalugu fond-it inatsisaata, inatsisillu tamalaat (Piginnittuiit nalunaarsornissaat eqqunneqarnissaanut) allanngortinnissaat anguniarlugit Naalakkersuisut, Danmark-ip Naalakkersuisuinut attaveqarnissaannut peqquneqarnissaannik, Inatsisartut aalajangiiffigisassaattut siunnersuut

(Partii Naleqqamit Inatsisartunut ilaasortaaitai)

Akissuteqaat

(Inuussutissarsiornermut, Nukissiuuteqarnermut Iisimatusarnermullu Naalakkersuisoq)

Siullermeerneqarnera

Naalakkersuisut Partii Naleqqap Inatsisartunut ilaasortaaitai aalajangiiffigisassaattut siunnersuummik saqqummiussineranut qutsavigai.

Kalaallit Nunaannut inatsit nr. 262, 16. marts 2016-imeersup atuutsilernerata nassatarissavaa ingerlatseqatigiiffinni piginnittuiit pillugit assingusutullu inatsisitigut inuttut naatsorsuussat allat siunissamut tunngatillugu paasissutissanik pissarsisarnissamut toqqortaqaarnissamullu pisussaaffeqalernissaat. Imatut isumaqarluni inuit taakkku, naggataagut suliffeqarfimmik piginnittuusut nakkutilliisuusulluunniit.

IIN-imik nalunaarsuiffiup atorunnaarsinnerata, aammalu CVR-imi suliffeqarfinnik nalunaarsuinermut ikaarsaariarnerup inatsisip Kalaallit Nunaannut piviusutigut atuutsitarilersinnaasimavaat, CVR-imi nalunaarsuisarfimmi nalunaarsorneqarnek suliffeqarfinnik piginnittuinnik nalunaarsugaqartussanik taakkuninnga naammaginartumik tutsuiginassusilimmik kinaassusersinnaatitsimmat.

Kalaallit Nunaata nunani tamalaani pisussaaffigisaminik naapertuutsitsisinnaaneramik Kalaallit Nunaannut inatsisip piviusunngortinneratigut qulakkeerneqassaaq, aammalu annertunerusumik paasisaqarsinnaatitsilissaaq, taamaalilluni ingerlatseqatigiiffiit ilusilersorneri paasiuminaatsut aqqutigalugit suliffeqarfimmik piginnittuiunerup paasiuminaassarnissaa ajornarnerulissalluni. Inatsit aningaasanik peqquserluutinik malunnarunnaarsaasarnerup pinerliiniarnermullu aningaasalersuinerup akiorniarnernik

nukittorsaaqataassaaq, aammalu ingerlatseqatigiiffinnut akileraarutigullu inatsisaasunik atonerluinermik akileraarutinillu akiliinaveersaarniarnermik pinngitsoortitsisinnaasalluni. Ilaatigut OECD-p iluani Global Forumimi akileraarutinik paasissutissanik paarlaaseqatigiittarneq pillugu nunani tamalaani suleqatigiinnermi Kalaallit Nunaat peqataavoq, tassungalu atatillugu Kalaallit Nunaannut ingerlatseqatigiiffinnut inatsisaasuni piginnittuinnut malittarisassianik aalajangersaasimanissarput pisariaqarluinnarpoq.

Taamaattumik Naalakkersuisut suliaasaqarfimmi inatsisissanik pisarialinnik atuutsitsilernissap piareersarneranut tunngatillugu Danmarkimik oqartussaasunik oqaloqateqalereersimapput. Ilanngullugu piginnittuinnut CVR-imi nalunaaruteqartarnissamut pisussaaffigisaq pillugu malittarisassianik imalinnik inatsit nr. 262, 16/03/2016-imeersup aamma inatsit nr. 676, 29/05/2018-imeersup Kalaallit Nunaannut atuutsilernissaat pillugit.

Siunnersuut, Naalakkersuisunit Inatsisartunillu ukiuni kingullerni inuussutissarsiornikkut-ingerlatseqatigiiffinnut kiisalu aningaasaliisarnermut inatsisinut annertuumik nutaanngorsaateqarnernut suliaqarsimanerannut naapertuuppoq.

Tamanna tunngavigalugu Naalakkersuisut siunnersuutip akuerineqarnissaa innersuussutigaat.